

L'ultima pert dla strada nòia por Rina

Cun n intervënt de 7,3 miliun de euro realisèia l'Assessorat provincial por i laùrs publics la terza y ultima pert dla strada nòia da Rina. Chèsc é le majer laùr che la Provinzia fej chèsc ann tles valades ladines. “Na miù strada por Rina é sciòche na avèna por che le paìsc pois se mantignì y se svilupé” sottrissèia l'assessor Florian Mussner. Le terzo y ultimo lot por miorè la strada da Rina reverda la pert söin-som cina sö da dljia. Ti agn passà él bele gnü fat les pròmes dôes perts dla strada mëton man jö da pé pro la Gran Ega. “Sön la vedla strada se stentà i auti dassènn da passè ia n camionn o na coriera, porchël èl debojègn da miorè la strada da Rina por che le paìsc ciafes de mius prospetives por le dagnì” spliga l'assessor Florian Mussner.

I laùrs vègn fac dala firma Oberosler da San Laorènz che á davagné le concurs. Le terzo lot mosöra passa dui kilometri y é gnü parti sö te de pici tòc da 400-500 metri. “Al gnarà laurè sön de pici tòc al iade a na manira



Rina ciafa la terza y ultima pert dla strada nòia: n'avèna de mantignimënt y svilup.

che an pois tosc fà altamo n asfalt provisor y passè plü saurì” spliga le diretor di laùrs Gustavo Mischi. Tratan i laùrs ne él nia odü danfora deviazions, i atri podarà passè aladò de n semafer. Tles ores de majer movimënt, da doman y da misdè, vègnel ciarè da mëte a jì palse a na moda da garantì na miù viabilité. Aladò dla proietazion, fata internamënter tl Assessorat por i laùrs

publics, gnarà slarié la strada cina a indöt 5,5 metri. Te de plü posc saràl ince debojègn da splanè la strada y da ingrandì les otes. Chisc intervenc se damana passa vint mëisc de laùr. Ajache al ne gnarà nia laurè ti mëisc plü frèic dorarà i laùrs feter dui agn. Le costimënt dl terzo lot dla strada nòia da Rina é de 7.341.650 euro y vègn döt curi dala Provinzia de Balzan. ■ AS

I jèuni va danora

I jèuni dla cin valedes ladines se à 15 y 16 de juni ancuntà tl prim festival interladin la junèza, “I ladins dla cin valedes ie ujins che se anconta puech danter ëi, i jèuni ie stai boni de pitè n festival dl'ancunteda, chèsc ie n var de gran valor per la union ladina y la dà crèta per l dauni” sorissea l'assessor ai jèuni ladins Florian Mussner.

Mo mei ne fovel unì metü a jì mumënc ulache i jèuni de Badia, Gherdëina, Fascia, Fedom y Ampezo possa viver si nteresc deberieda. L “Festival Jonèza” a Corvara à pità na lingia de ativateies che va dala mujiga, al teater, ert y sport te formes atratives per i jèuni. “Te chëla che i jèuni possa ntan l festival viver si pascion per la mujiga y per la truepa ativateies se divertian deberieda, vëniel a se l dé mumënc de ancunteda y chèsc ie de gran valor per la mendranza ladina” mët a cuer l assessor Mussner che fej

referimënt al gran bujèn de miurè i cuntac danter i ladins che vif tla cin valedes dla Dolomites. “I jèuni à abü la ulentà de purté adum i jèuni dla cin valedes y ie cun l festival nce stai bon de la mëter a jì. Sëura-prò a pitè n avnimënt per i jèuni sorissea Mussner nce doi fazions per n tèmp plu lonch: “Per la mendranza juda l festival a miurè i cuntac danter i ladins dla cin valedes, ai jèuni ti dal rejon de se identifiché mo de plu cun nosc ncësa.” ■



Nutizies ladines tres internet

Nutizies d'atualità y nformazion de utl dala Provinzia vën publichedes nce tres internet. La puscibleis neuves che la rë internet pieta, devënta, dantaldut per la generazion jëuna, plu y plu l mesun de nformazion prinzipel. Chèsc nia me ajache n ti ruva permez da unì pert dl mond, ma nce ajache chëi che liej, cëla y scota su, possa rujenè pea cun comentares persunei. ■

I canai de nformazion dla Provinzia tla rujeneda ladina

www.provincia.bz.it
www.provincia.bz.it/usp-ladin
www.provincia.bz.it/meteo-ladin

Facebook: Jonta dla Provinzia de Bulsan
www.twitter.com/ProvinciaBZ
www.youtube.com/ProvinciaBulsan

Scolines: trëi rujenedes cun sistem

N n bon lëur se domanda suvënz nce truep tëmpe: do set ani che la scolines lëura bele cun na didatica speziela per nsenië trëi rujenedes zënza che i plu pitli ne vënie nia sëuraciariei, iel sën unì dat ora na mapa de materiali didatics. A chësta maniera fej la scolines ladines n var de cualità cun metodologies inuatives.



foto Stuffer

Alexander Stuffer

La realtà ti luesc ladins se damanda de savëi de plu rujenedes. L sistem scolastich ladin ti vën do a chësc bujën scumencian bele tla scolina a lauré cun trëi rujenedes. Acioche i mëndri ne vënie nia sëuraciariei, lëuren cun n sistem che fej orden, reprejantan unì rujeneda cun n auter culëur: cuëcen per l tudësch, ghiel per l talian y vërt per l ladin. La scolina à for inò fat vares inant te chësc nseniamënt plurilinguistich. Da una pert iel la maestres nstëses che à laurà ora materiali de nseniamënt aldò dl orden linguistich di trëi culëures. A nivel scientific iel nrescides neurolinguistiches che testemunieia che l cervel lëura te na maniera ntegrada y che a mparé rujenedes se nuzeiel de cumpetënzes linguistiches che l à bele.

Orden linguistich per i mëndri dla scolina: unì rujeneda à n auter culëur.



foto Stuffer

Materiali per nsenië trëi rujenedes: n travert mpurtant per la scolines, susteni dà Roland Verra, Hannelore Insam, Theodor Rifesser, Edith Ploner, Rico Cathomas y Florian Mussner.

La uniteies didatiches nueves à doi ponc zentrei: les ie fates a na maniera da nuzé la cunescënzes linguistiches che i pitli à bele. Cun l sistem di trëi culëures vëniel fat orden a na maniera che i pitli posse svilupé na struttura. “La metodologia visuela juda a tò su plu sauri la paroles nueves y a les lauré su” nscì l profesëur Rico Cathomas.

“L sistem scolastich cun de plu rujenedes ie for plu cunesciù ora dla valedes ladines y truepa families dl Sudtiroi l ulëssa ènghe avëi” à dit l assessëur Florian Mussner pra la prejentazion dl material didatich a San Martin de Tor. Ma davia che nosta situazion de mendranza ie tan particulera, ne possel per l nse-

niamënt nia unì cupià materiali da d’autri luesc. La culaburadësses dla scolina se à te chësc cajo dat dassënn da fé y l resultat ie n proiet de cualità: “L sistem scolastich cun plu rujenedes ie stat n suzes, la sarà for n majer suzes y l fajerà storia” à dit Mussner, sciche reprejantan ladin tla Jonta provinziela.

La gran cualità dla mapa de lëur ie aldò dl ntendënt Roland Verra unida a se l dé ajache la ie unida laurèda ora te n dialogh, fajan truepa proves pratiches y cun n gran barat de feedback via y ca. Sëuraprò iel materiali laurèi ora da chiche lëura di per di cun i plu pitli.

La mapa cun 30 uniteies didatiches che trata argumënc de natura, ties, savëi dl corp, maië, culëures y stories tla trëi rujenedes.

Chësc var de cualità per l nseniamënt tla scolines ladines ie unì fat te na gran culaburazion dla scolina cun l’università y l Servisc de Inovazion y cunsulënza. “Sce la scolines ladines ie bones de tenì chësc livel aut, iel nce per merit di mesuns y dla stieres che ie for inò unides metudes a ji tres l assessëur ladin” à sorissà l’ispeturia Edith Ploner pra la prejentazion tla sënta dl Istitut Culturèl Ladin. ■